

He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.

He whakarāpopoto

Pānuihia te whakarāpopoto ki te ākonga. Kei te ako te tama nei ki te hoe tōtika i tōna waka ama. Kei te māia haere ia. Kei te ngaro haere tōna matakū. Engari i a ia e whakahihī ana, ka ...

He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou, me mahi rawa te papa kupu me ngā whakaahua kei te uhi. Me whakamaumahara hoki te ākonga kia pātai ki a ia anō, i te wā e pānui ana ia mai i te tīmatanga ki te mutunga o te pānui.

Whiriwhiria ngā kare ā-roto pea o te tangata e pīrangi ana ki te ako ki te hoe i te waka ama, engari e āhua matakū ana ki taua mahi. Ki te ākonga, he aha pea ngā mea whakamatakū o taua mahi?

Ki te ākonga, ka rongopē ia i te aha ina nuku te waka ama?

Matapakia te māmā, te uaua rānei ki te ākonga o te ako ki te hoe i tētahi waka ama, me ngā take i pērā ai.

He Matapaki

Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārama ana mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga mō tana tiro ki mua i whakaputa ai ia i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te



- mīhini rīpene kōrero, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga me ngā whakautu

1. Kei te ako te tama ki te aha?
2. Kei te matakū ia ki te aha?
3. Kei te whakatairite ia i ngā momo nekenga o te waka ki ngā aha?
4. I pēhea te mutu i a ia tōna matakū?
5. He aha ia i whakamā ai i te takahuritanga o te waka?

1. Ki te hoe i tētahi waka ama.
2. Ki te hōhonu o te wai, ā, kāhore hoki ia i te pīrangi ki te takahuri.
3. Ki ngā nekenga a ētahi momo kararehe.
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

Te pūtake

T He tautuhi i tētahi raupapatanga.

He whakatakinga ā-roto, he whakaharatau

I mua i te pānui i te pukapuka, kōrero mō te pīrangi ki te ako o tētahi pūkenga hou me te noho matakū tonu. Matapakia te āhua e āwhinatia ai pea te ākonga mā te whai i tētahi hātepe kua āta whakarite kia kore e noho matakū. He aha pea ētahi o ngā kōrero a te pouako ki te ākonga i te otinga pai o tētahi mahi hou?

Kia oti i te ākonga te pukapuka te pānui, matapakia ngā huarahi i whāia e te pouako ki te āwhina i te tama ki te whakamemeha i tōna matakū. Titiro ki te āhua hātepe o te whakauru pūkenga: te kuhu ki rō waka, te noho tika, te aha, te aha. Whakaritea kia tautuhi te ākonga i ngā pūkenga rerekē me te raupapa i whakaakona ai.